



Na osnovu člana 10. stav 1. tačka 14. Zakona o nacionalnim savetima nacionalnih manjina ("Službeni glasnik RS", br. 72/2009, 20/2014 – odluka US i 55/2014), člana 14. stav 1. tačka 17. člana 61. stav 1. Statuta Bošnjačkog nacionalnog vijeća (broj 535-12/2015 od 15.05.2015. godine) i člana 57. stav 1. Poslovnika Bošnjačkog nacionalnog vijeća (broj 536-12/2015 od 15.05.2015. godine), Bošnjačko nacionalno vijeće na sjednici održanoj dana 01.04.2016. godine, donosi sljedeću

## **ODLUKU**

### **O POLOŽAJU BOŠNJAKA U SANDŽAKU, ODNOSU DRŽAVNIH ORGANA PREMA BOŠNJACIMA SANDŽAKA I UPUĆIVANJU ZAHTJEVA MEĐUNARODNIM INSTITUCIJAMA I OGRANIZACIJAMA U CILJU ZAŠTITE BOŠNJAKA U SANDŽAKU, OBEZBJEĐIVANJU RAVNOPRAVNOSTI I OSTVARIVANJA INDIVIDUALNIH I KOLEKTIVNIH PRAVA**

#### **Član 1.**

Bošnjačko nacionalno vijeće konstatuje da je položaj Bošnjaka u Sandžaku izuzetno težak, nepovoljan i neodrživ, kao i da su Bošnjaci narod pod prijetnjom, kako je to u svom izvještaju za 2014. i 2015. godinu konstatovala Minority Rights Group International, kao signal ranog upozorenja.

Bošnjačko nacionalno vijeće konstatuje diskriminatorski i neprijateljski odnos državnih organa Republike Srbije i nosioca najviših državnih funkcija u Republici Srbiji prema Bošnjacima Sandžaka.

#### **Član 2.**

Bošnjačko nacionalno vijeće traži od predsjednika Republike Srbije i predsjednika Vlade Republike Srbije da javno povuku izjave, date nakon izricanja presude Radovanu Karadžiću, kojima iskazuju razumijevanje i blagonaklonost za sve zločine koje su počinili Radovan Karadžić i srpske snage tokom stvaranja Republike Srpske, kao i da upute javno izvinjenje pripadnicima bošnjačkog naroda zbog takvih izjava.

Bošnjačko nacionalno vijeće traži od predsjednika Republike Srbije i predsjednika Vlade Republike Srbije, da u ime Republike Srbije upute javno izvinjenje žrtvama i porodicama žrtava organiziranog državnog terora u Sandžaku i da preduzmu sve potrebne mjere kako bi se otkrili, procesuirali i kaznili svi odgovorni za zločine nad Bošnjacima u Sandžaku u periodu od 1990. do 2000. godine.

#### **Član 3.**

Bošnjačko nacionalno vijeće traži od Vlade Republike Srbije da hitno i bez odlaganja pristupi usvajanju novog Akcionog plana za ostvarivanje prava nacionalnih manjina u okviru pregovaračkog poglavlja 23 i da istim posebnu pažnju posveti rasvjetljavanju zločina nad Bošnjacima u Sandžaku, kao i obaveznom sprovođenju lustracije među pripadnicima vojske, policije, službi bezbjednosti, sudstva, tužilaštva i drugih državnih organa koji su na bilo koji način učestvovali u navedenim zločinima.

Bošnjačko nacionalno vijeće protivi se odluci nadležnih državnih organa o slanju pripadnika specijalnih jedinica policije Srbije u Novi Pazar koje su izvršile blokadu grada i bespotrebno demonstrirale silu.

Bošnjačko nacionalno vijeće posebno izražava zabrinutost zbog odluke nadležnih organa da se zaostala fudbalska utakmica visokog rizika između Novog Pazara i Crvene Zvezde odigra dva dana prije izricanje presude Radovanu Karadžiću u Haškom tribunalu, odnosno 22.3.2016. godine.

Bošnjačko nacionalno vijeće osuđuje ponašanje specijalnih jedinica policije Srbije koje su omogućile nesmetan ulazak naoružanih fašističko-četničkih grupacija na gradski stadion u Novom Pazaru a koje su tokom cijelog toka utakmice upućivali genocidne prijetnje Bošnjacima, veličali ratne zločince koji su izvršili genocid nad Bošnjacima i isticali fašističko-četničke simbole.

Bošnjačko nacionalno vijeće najoštrije osuđuje jasno izraženu namjeru Vlade Republike Srbije da, na gore opisan način, zastraši Bošnjake i izazove sukob sa bošnjačkim civilnim stanovništvom u Sandžaku.

Bošnjačko nacionalno vijeće izražava zabrinutost zbog oslobađajuće prvostepene presude Haškog tribunala Vojislavu Šešelju jer ista dodatno izaziva osjećaj straha i nesigurnosti kod Bošnjaka.

#### Član 4.

Bošnjačko nacionalno vijeće traži od Savjeta bezbjednosti UN-a, da bez odlaganja obezbijedi u Sandžaku prisustvo međunarodnih snaga za sprečavanje konflikta, kao i da preduzme druge hitne preventivne mjere, u cilju zaštite bošnjačkog naroda u sjevernom dijelu Sandžaka koji se nalazi pod upravom Srbije.

Bošnjačko nacionalno vijeće traži od Organizacije za evropsku bezbjednost i saradnju da hitno i bez odlaganja uspostavi svoju posebnu misiju za Sandžak, u cilju zaštite bošnjačkog naroda u sjevernom dijelu Sandžaka koji se nalazi pod upravom Srbije.

Bošnjačko nacionalno vijeće traži od Evropske unije da hitno i bez odlaganja uspostavi posebnu misiju Evropske unije za Sandžak, u cilju zaštite bošnjačkog naroda u sjevernom dijelu Sandžaka koji se nalazi pod upravom Srbije.

Bošnjačko nacionalno vijeće traži od Savjeta Evrope da hitno i bez odlaganja uspostavi svoju posebnu misiju za Sandžak, u cilju zaštite bošnjačkog naroda u sjevernom dijelu Sandžaka koji se nalazi pod upravom Srbije.

#### Član 5.

Ovlašćuje se predsjednik Bošnjačkog nacionalnog vijeća, da se u cilju implementacije ove odluke, obrati organima i predstavnicima međunarodnih institucija i organizacija iz člana 4. ove odluke.

#### Član 6.

Odluka stupa na snagu danom donošenja.

U Novom Pazaru, 01.04.2016.godine  
Broj: 314-09-2016



Bošnjačko nacionalno vijeće  
Predsjednik  
Dr. Sulejman Ugljanin

*Sulejman Ugljanin*